

DISSERTATIO INAUGURALIS MEDICA
DE

VERA MOTVVM
FEBRILIVM IN-
DOLE AC SEDE

QVAM
DIVINI NVMINIS AVSPICIIS
PRÆSIDE

DN. FRIDERICO HOFFMANNO,
COLLEGII MEDICI SENIORE ET h. t.
DECANO,

PRO GRADV DOCTORIS

AD D. XI. OCTOBR. A. O. R. C1813CCXXIII.

Publico Eruditorum examini submittet

IO. FRIDERICVS CHRISTIANVS
Ehrenhauf,
PVLSEN. LVSAT.

HALÆ MAGDEBVRGICÆ,

Typis JOHANNIS CHRISTIANI HILLIGERI, Acad. Typ.



DISSERTATIO INAUGURALIS MEDICA
DE
VERA MOTVVM FEBRI-
LIVM INDOLE AC SEDE.

PRAEFAMEN.



FX universa morborum classe nullus præter febrem est, qui gravius & frequentius humana affligat corpora iisque interitum minetur. Febris enim est, quæ nec sexui ulli, nec ætati, nec temperamento, aut loco parcit, sed omni tempore favissime & frequentissime homines infestat; ut hinc optimo iure universalis morbus dici & haberi debeat. Et ut ut sæpissime principalis morbus sit, tamen plurimis etiam aliis gravibus iisque chronicis passionibus associatur

tur, quemadmodum apparet in hydrope, phthisi, cachexia, quibus plerumque funestum imponit finem. Immo, si dicere licet quod res est, mors a causa interna proficiscens rarius sine febre contingit. Ex quibus clare apparet, non infensiores naturæ humanæ, qui illi exitium & destructionem minatur, hostem existere, quam febrilem morbum. Quamvis vero proinde non dubitandum sit plurimos in morbo perire ex febre; attamen & id negari nequit, sed res planæ & perspectæ experientiæ est, plures a febre sanescere & meliorem sanitatis statum, quam antea, per febrem recuperare, ut inde etiam præclari & olim & nostris temporibus viri febrem in se & sua natura non esse noxiam & insalubrem, sed potius præsidium, vitæ & sanitatis pleno ore affirmare non dubitarint. Quum itaque motuum, qui febrem efficiunt, tam diversa sit natura atque operatio in corpus nostrum, ut per hos vel homo pereat, vel per eosdem, causa morbi sublata, sanitati restituatur; oportet utique maxime omnium veram motuum febrilium indolem, proprietates, potentiam atque diversum effectum, quem in corporibus humanis exserunt, paulo studiosius indagare atque intimius dignoscere Medicum; quo postea de febrium eventu, nec non eas curandi methodo certius & rectius iudicium formare possit. Verum enim vero quo utilior & magis Medico necessaria est doctrina de febribus, eo magis dolendum est, in universo scientiæ medicæ ambitu, nullam tantis difficultatibus & tam diversis hypothesebus atque opinionibus esse subiectam, quam illam, quæ de febribus agit; adeo, ut quid veri & solidi statuendum sit, vix in tanta scriptorum copia & varietate reperire liceat. Quapropter nec oleum nec operam me perdere posse credidi, si inaugurale profectuum meorum specimen editurus, huic potissimum argumento enucleando animum adiicerem, meamque de *motuum febrilium natura & sede,*

de sententiam, paulo planius & liberius declararem. Quibus coeptis ut benignissimum Numen desideratissimam suam gratiam addat, est quod devotissime precamur!

§. I.

DUm itaque de motuum febrilium genio atq; indole differere animus est, primo omnium id pro certo & explorato supponendum est: a nullo unquam morbo tam subitam, præcipitem & gravem mutationem & turbationem in functionibus partium corporis nostri, quam in febribus, animadverti; neque ullam fere partem esse, quæ non patiatur atque affecta sit, sive quis intermittente, sive continua, febre laboret. Ingens enim adest sub omni febrili motu virium languor, ciborum appetentia perit, digestio cessat, alvus suum deserit officium, nutritio intercidit, summa adest anxietas & iactatio corporis, somnus laudabilis deficit, dolor caput, lassitudo omnes artus torquet, urina & ratione quantitatis, & consistentiæ, & coloris, est mutata, universum corpus æstuat, ægrotat quoque mens, arteriarum & cordis pulsus plane est immutatus, solito frequentior, extrema corporis sæpius horrent & frigent.

§. II.

Quum itaque tanta tamque gravis mutatio in functionibus partium corporis humani sub febre deprehendatur; nullus vero effectus in corpore sine causa proportionata fiat, facile quidem patescit: gravissimi momenti esse id, quod præternaturalem hunc statum parit; sed veram & adæquatam ejus causam recte indagare ac invenire, res non adeo facilis, sed plane ardua est. Nolumus enim hac in re veteres & recentiorum quosdam imitari, qui, mi-

rabilium in corpore humano effectuum veras causas si ignorant, nil nisi mera nomina maxime obscura allegant; confugientes in hac de febribus doctrina, ad calidum innatum in corde accensum, fermentationem sanguinis p. n. summe calidam, flammulam vitalem auctam, archeum furibundum, validam naturæ adversus morbum pugnam, fermentum febrile, turbationem craseos sanguinis ab æthere peregrino factam. Nos missis sterilibus ejusmodi commentis, ex intima potius rerum naturæ philosophia, quam recentiores mechanicam appellant, veras vitæ, sanitatis, morborum & mortis, immo omnium mutationum, quæ in corpus humanum incidunt, causas dilucide explanari posse putamus. Nimirum observarunt sagacissimi nostro hoc ævo rerum naturalium indagatores, omnes mutationes, operationes atque effectus, qui in rerum corporearum natura contingunt, a solo motu & sola corporum ad motum dispositione proficisci; ita nempe, ut pro varia corporum ratione molis, figuræ, situs & nexus diversitate, diversi etiam motus producantur. Hinc quemadmodum in universo unum corpus semper agit in alterum & pro diversa illa actione & reactione diversæ resultant actiones; ita pari ratione certus quisque & determinatus in corpore, præsertim organico, effectus, ab adæquato, specifico & certo partium motu provenit. Quod si itaque tantæ turbationis ac læsionis functionum, quæ in febribus apparet, causas inquirere velimus, easdem ex nullo alio fonte, quam solidorum & fluidorum, e quibus machina humana composita est, mutata dispositione & turbato motu derivare debemus.

§. III.

Vt autem eo clarius innotescat, in quo potissimum febr-

febrilis morbus a sanitatis statu recedat, operæ erit omnino pretium, ut hunc quodammodo delineemus. Nimirum omnium actionum integritatem, quæ sanitatem constituit, in corpore existere, animadvertimus; si placidus, moderatus, liber & æquabilis sanguinis & fluidorum per compagem corporis nostri mere vasculosam motus atque cursus est. Quum vero fluidorum motus a solidorum sive fibrarum nervearum, ex quibus præter vasa etiam tota corporis nostri compages contexta est, resistantia, tono, robore, oscillatione, elasticitate & contractili potentia maxima ex parte dependeat; hinc in statu sanitatis moderatum esse cordis & arteriarum pulsum & solidorum resistantiam ac tonum æquabilem intelligimus, adeo, ut non nimis tensa & aucta sit fibrarum contractilitas nec nimis laxa & remissa. Si constitutis hoc modo solidis, fluida debita temperie, mole ac fluxilitate gaudent, æquabilis & secundum vasa proportionatus humorum fit circulus, nec una pars plus vel minus, quam debet, recipit, omnesque & secretiones, & excretiones, ad vitam conservandam, nutritionem perficiendam viresque sustinendas perquam necessariae, vigent.

§. IV.

Constituta sic vera actionum, quæ in statu sano secundum naturam, ordinem & regulam fiunt, causa, motu nempe æquabili solidorum & fluidorum; facillimum iam erit in veram tantæ turbationis & læsionis omnium actionum in febribus causam inquirere, quæ vicissim vix alia est, quam inordinatus, irregularis & inæquabilis solidorum & fluidorum motus, cuius naturam ut curatius paulo describamus, necessarium non minus quam utile erit. Tenendum itaque est, in omni febrili accessione

duplicis generis in solidis & fluidis motum inordinatum
 observari; alter, qui prior & ordine præcedit, statim ab
 initio febris fit, & in partibus externis atque extremis &
 ubi minimorum vasculorum copia adest, maxime in inte-
 gumentis corporis præsertim cute viget. Increfcit nempe
 in solidis hisce & nervosis partibus, quæ minima tantum
 vasa admittunt, vis contractilis, qua fibræ in se re-
 deunt & coarctantur, atque vascula & tubuli subnexi an-
 gustantur & comprimuntur, ut fluidorum per hæc ipsa flu-
 xus & refluxus sufflaminetur. Aucta hæc motus contra-
 ctorii species, quæ Græcis spasmus dicitur, non modo u-
 niversam cutim & omnes partes externas occupat, sed et-
 iam inæquabili harum partium motione reddita, ingentem
 mutationem fluidis quoque corporis nostri infert; siqui-
 dem impedito libero per angustiora vasa transitu, affluens
 humor reprimitur ad partes interiores, ut earum vasa ma-
 iorem, quam par est, sanguinis copiam recipiant & sic ab
 inæquabili solidorum motione motus quoq; sanguinis &
 fluidorum fiat inæqualis. Is enim nobis æquabilis fluido-
 rum dicitur motus, quando fluida non maiorem impetum
 faciunt in unam, quam in alteram partem; & vis solido-
 rum contractilis æquabilis dicitur, quando premit æqua-
 liter liquida in omnibus partibus. Proinde quandocun-
 que partes externæ præter naturam spasmo constringun-
 tur, sanguis repellitur ad interiora, & extrema decumescunt,
 refrigescunt, rigent, horrent, vasa disparent, asperitates ex-
 surgunt & perspiratio liquidi per cutis colatorium impedi-
 tur; fluida vero cum impetu ad interiora delata cephalalgi-
 am, inquietudinem, phantasiæ perturbationem, anxietatem
 & gravitatem pectoris, virium oppressionem, pulsus fre-
 quentem, debilem & parvum, dolorem dorsi, intume-
 scentiam abdominis a flatibus & angorem gignunt. Spa-
 smicum

sticum hunc partium solidarum motum, qui a superficie corporis ad interiora convertitur, atque in intermittentibus clare conspicuus est, sensim paulatimque alter contrarius in solidis & fluidis partibus subsequitur; quo cum vasis interioribus, vigore motus systaltici aucto, cum impetu quodam & vehementia sanguinem omnisque generis fluida ad exteriora, & superficiem corporis urget & pellit. Hinc sub eodem calor totius corporis valde increfcit, pulsus fit magnus & celer, habitus corporis tumet & rubet humidique fit appetentia. Atque hic duplex sibi que oppositus motus formalem febris rationem continet, in que ejus consideratione vera & rationalis februm theoria consistit.

§. V.

Hæc hæctenus tradita mechanica febrium doctrina, quæ in inæquali sanguinis motu atque influxu in partes maxime consistit, non recenter excogitata est, sed antiquissimo & optimo artis nostræ parenti cognita iam tum & perspecta videtur, quippe qui *libro de flatibus* hæc notatum perquam digna prodidit verba: *desiliente ab extremis corporis partibus sanguine & viscera & carnes contremiscunt. Aliæ enim corporis partes copioso sanguine refertæ, aliæ exsanguæ tunc existunt; atque exsanguæ quidem ob frigus minime conquiescunt sed concutiuntur, quæ vero sanguine replentur, ob sanguinis copiam contremiscunt & inflammationes excitant.* Præter Hippocratem notandus quoque Pergamenus, qui *libro II. de caus. symptomat. cap. 5.* eximio sane loco translationem sanguinis a partibus exterioribus ad interiores, & rursus ab interioribus ad exteriores, hunc in modum proponit: *est quædam ex primis & principalissimis motionibus ipsa naturalis caloris intro foras-*
que

que delatio multas animi passiones sequens: simul autem cum ipse & spiritus & sanguis modo intro & ad principium feruntur ac contrahuntur, modo foras distenduntur & funduntur. Et licet motus hos evidenter perspicere cum aliis multis tum in ipsis animi perturbationibus e. g. terrore & ira, ille intro & ad principium spirituum & sanguinem una cum refrigeratione corporis superficialia subducit & contrahit, hæc vero foras agit, fundit & calefacit. Quæ luculentissima allata testimonia liquido sane demonstrant, veteres motus hos reciprocos sanguinis, qui fiunt a peripheria ad centrum sive ab exterioribus ad interiora & rursus a centro ad peripheriam, sive ab interioribus ad exteriora, in statu præternaturali probe non solum observasse sed & intellexisse.

§. VI.

Maxime vero omnium in hac motuum febrilium consideratione sciendum est: febrem, sive motuum qui febrem constituunt, universum apparatus primario & essentialiter systematis nervosi, sive partium solidarum fibroso-nervæarum, quæ sensibus & motibus maxime vacant, esse affectionem præternaturalem, & quidem maxime spasmodicam; cui principaliori causæ postea circulatio humorum intensior cum pulsuum vehementia & celeritate, aliæque febribus communia symptomata debentur. Nam quicumque febris essentiam in sola sanguinis circulatione nimirum aucta versari contendunt, ii non leviter mihi errare videntur, quum frequentissime contingat, ut a motu & exercitatione corporis vehementiori, a potu spirituosorum liberaliori, a balneo nimis calido, vel etiam ab æstu solari nimis fervido universum corpus incalcescat, pulsuumque adsit & vehementia & celeritas, nec tamen febrem adesse dicendum

dum fit. Hinc nisi a præcedente spastica solidorum contractione cordis & arteriarum pullatio augeatur & calor intensior reddatur, hæc febriles commotiones mentientia phænomena neutiquam pro iisdem haberi debent.

§. VII.

Posteaquam igitur adstruximus febrem esse totius generis nervosi affectionem spasmodicam, ulterius tenendum est: febriles spasmos non tantummodo in partibus externis atque extremis, ubi horrorem, refrigerationem & manifestam ad oculum vasorum & pororum subsidentiam efficiunt, subsistere, sed etiam ad interiora transire; ita tamen, ut hanc vel illam partem gravius affligant, quamvis non æquali in singulis febribus gradu atque vehementia. Ut enim a nobilioribus partibus, capite nempe, incipiamus, frequentissimum tam intermittentium, quam continuarum febrium solet esse symptoma cephalalgia, quæ dolore non tam gravativo, sive distensivo, quam potius acuto, pungitivo & pressorio conspicua est, & a spastica membranarum, quæ cranium tegunt, strictura oritur. Nam quo magis tensæ & constrictæ sunt membranæ, eo graviores dolores ab influxu copiosioris liquidi patiuntur. Nihil quoque est frequentius quam quod febricitantes variis phantasmatibus, quæ vigilantibus æque ac dormituriis obveniunt, torqueantur, ut etiam vel ex levissima causa timore & terrore percellantur, aut plane male cohærentia loquantur, ipseque somnus vel nullus sit, vel insomniis gravioribus turbatus. Quæ omnia a nulla alia causa, quam a membranarum, quæ cerebrum eiusque anfractus interiores cingunt, æquabili tono sublato & resistentia aucta, uno verbo, spastica strictura, proficiunt. Dein nimia humidi appetentia, cum oris, faucium

& linguæ ficcitate plerumque febribus laborantes affligere solet; cuius inexhaustæ sitis causa non defectui humidi, sed spasticæ glandularum oris, faucium & œsophagi, quæ has partes perpetuo humectant, strictione debetur, id quod vel ex eo clarissime apparet, quia largissimi etiam potus copia non sistitur, & non tantum in nimio æstu, sed etiam in principio intermittentium, ubi extrema horrent & frigent, sæpissime urget. Porro ii, qui febre detinentur, de insigni anxietate circa præcordia cum spirandi angustia & pectoris oppressione conqueruntur; quarum afflictionum causam, qui a strictione membranarum ventriculi eiusque orificiorum clausura, quam inflatio diaphragmatis liberum motum impediens sequitur, deducunt, ii mea quidem sententia non errare videntur. Plurimis quoque febribus, præsertim intermittentibus, conatus ad vomendum vel frequens vomitus complicatur, qua non modo ingesta, sed & biliosa magna in copia reiiciuntur, ut miranda sæpe sit eiectionum copia; cuius biliosi & crebrioris vomitus causa tam ventriculi convulsioni, quam etiam universo systemati canalium biliariorum, qui per totum hepar disperguntur, spasmo & convulsione afflicto tribuenda est. Conflatus enim totus ille biliosus canalis est ex membranis admodum fibrosis & nerveis, ad spasticas strictiones admodum dispositus, quemadmodum videmus post iram & assumptum emeticum, adaucto huius canalis motu, biliosum, quem vehit humorem, maxima in copia in ventriculi vel intestinorum cavum repelli. Dantur etiam febres cholericæ, quæ copiosis vomitionibus & alvi deiectionibus stipantur, ob intensiorem redditum contractilem & spasticum biliosi per hepatis viscus dispersi canalibus, nec non ventriculi & intestinorum motum; id quod vel

ex eo clare dilucescit, quod hæ incongruæ eiectiones conveniente anodyno repetitis vicibus oblato, citra ullius materiæ correctionem brevi tempore commodissime fisci & compesci queant. Ut plurimum vero alvus tensa, dura & clausa sive compressa in febre est, ut nec flatus neque excrementa libere transeant; quod itidem vehementis stricture, qua intestinorum membranæ musculo - nerveæ afficiuntur, effectus est. Urinæ quoque tenues, aquosæ, sine sedimento, sæpius in febribus, sed malo omine, redduntur cum crebro simul ad mingendum stimulo, manifesto indicio, vesicam & ductus urinosos nerveo-membranaceos gravi stricture & nimia contractione esse affectos.

§. IIX.

Præterea individuus febrium comes est pulsus celer & durus, a spastica quadam stricture oriundus, qua arteriarum tunicæ musculares & nerveæ maiorem tensionem & resistentiam acquisiverunt. Accedit intensissimus ille æstus, qui pariter ex validiori facta tensione atque stricture systematis vasculosi, per quod liquida transire debent, oritur. Nam quo velocius liquidum vehitur per constrictos & tensores tubulos, eo plus intestinus partium attritus motus, qui caloris fons est, increscit. Compertum porro est, plerarumque febrium, sive intermittentes sive continuæ sint, insultus invadere cum dolore dorsi, languore ac lassitudine membrorum, dolore infestante maxime primam lumbarem vertebam, cui adhærescit insignis nervorum plexus, qui mesentericus audit, & hinc nullum est dubium, quin a tensione & contractione eiusdem fixus hic dolor subnascatur. Lassitudo vero artuum & contusivus, qui non raro corripit pedes, dolor, a male affecto periostio derivandus venit. Denique quemadmo-

dum summa illa inquietudo & corporis iactatio, cum magna anxietate iuncta, afflicti generis nervosi foetus sunt & pessimum signum exhibent; ita tendinum subsultus, convulsivi & interdum epileptici motus & arteriarum inæquales ac tremulæ motiones, prodromi mortis existunt, & a gravissime afflicto genere nervoso originem suam ducunt.

§. IX.

Quamvis vero non facile quisquam dubitaverit, in omni febre totum vasorum & fibrarum genus præternaturali tensione & spastica constrictione laborare, & hanc ipsam esse omnium symptomatum, quæ febrem comitantur, & intensi etiam æstus causam, originem ac fontem; id tamen nondum satis a doctissimis etiam ingeniis explanatum novi, in qua potissimum parte primario affecta incipiat hæc spasmorum tragœdia, ut postea in universas nervosas corporis partes propagetur. Vt itaque in harum rerum difficultate meam quidem clarius exponam sententiam, assero: in illis locis esse motuum febrilium & præternaturalium, quibus solida afficiuntur, principium constituendum, in quibus, & ex quibus, omnia solida, ex fibris & membranis nerveis contexta, suum naturalem tonum, motum, potentiam motricem ac robur accipiunt. Quemadmodum vero notum ex mechanicis est, solida quiescentia a corporibus in motu iam constitutis vim & potentiam a loco & situ suo se dimovendi accipere; ita etiam nihil sane dubii superest, quin omnes corporis nostri partes solidæ, quæ naturali ac mechanica dispositione & structura ad motum subeundum gaudent, vim suam motricem a fluidis tenuissimis, quæ in motu iam sunt constituta, & hinc ab Hippocrate recte impetum facientes partes dicuntur, nanciscantur. Nam uti in macrocosmo ætheris & æris fluidum,

ut

ut patet ex eorum calore & elasticitate, mirabilem in corporibus etiam durissimis movendis effectum edunt, ita pari ratione certo certius est, liquidum illud tenuissimum aëreo-æthereis elasticis particulis refertum, quod ex sanguine in cerebri & medullæ spinalis angustissimis canaliculis separatur, & per nervosos ductus, poros ac interstitia ad membranas & fibras fertur, his ipsis secundum naturam, tonum, robur & potentiam movendi impertire, & præter naturam ordinem etiam hos motus augere atque intendere. Et enim in eo utique & cerebri & spinalis medullæ, quæ ex observatione Malpighii semper primum formantur & in utero, & sine quibus nullus sensus vel motus perficitur, consistit officium, ut agilissimum & magna vi motrice instructum liquidum a sanguine separent, idque per universum corpus amandent. Veteres non inepte hoc fluidum spiritus animalis nomine insigniverunt, eo quod observaverint, animam sine eo nihil operari posse, & hoc absente cessare illius operationem in corporis partes.

§. X.

Asserimus itaque cerebrum & spinalem medullam esse illas partes, a quibus motionis & sensationis modus, origo & causa peti debeat, pro qua nostra assertione ulterius quoque militat: quod in omnibus morbis, qui sedem suam habent in cerebro, vel eius membranis, ut sunt mania, melancholia, phrenitis, apoplexia, epilepsia & affectus soporosi, non modo cordis & arteriarum pulsus, sed & tonus naturalis omnium solidorum mirifice immutetur, & præternaturalis reddatur, sanatis vero iisdem ad statum naturalem redeat. Porro ex attenta in præxi medica observatione liquido constat, pari ratione in

morbotis spinalis medullæ afflictionibus, cuius census sunt abolitiones sensuum & motuum in artubus, vel etiam agitationes eorum spasmodico-convulsivæ, semper insignem pulsum, toni ac roboris, quo gaudent solidæ, fibrosæ ac nerveæ partes, varietatem & præternaturalem mutationem animadverti. Denique quanta mutatio in pulsu cordis & arteriarum, nec non tono universi systematis nervosi, ab animi gravibus affectibus, ira, timore proveniat, quotidianæ observationis est; actiones vero animæ non immediate in solida, sed in fluida tenuissima, quæ solida regunt, operari, & rationi & experientiæ convenientissimum est. Et enim res perquam notissima est, animam nihil plane operari posse in corporis partes etiam per intensissimam voluntatem, vitiatis illis partibus, quæ fluidum illud subtilissimum ad partes sensui & motui inservientes transmittunt; id quod experimento clare innotescit, quo ligato vel abscisso, qui ad musculum quendam tendit, nervo, protinus omnis sensus & motus huius musculi, salva eius structura, exspirat. Et præterea si anima solidis & duris corporibus vim motricem addere eamque augere posset, id sane longe facilius fieri posse in fluidis, quæ iam in motu constituta sunt, & quorum vires tantum modo ad hunc vel illum locum magis vel minus determinari debent, certissimum est atque verissimum.

§. XL

Constituta iam spinali medulla cum cerebro omnis sensus & motus origine ac causa; ad spasmodorum febrilium originem considerandam transcendimus, & tum experientia, tum ratione suffragante, hanc de eorum generatione fo-

vemus sententiam: quod ex medulla spinali, nec non ex membranis cerebri motuum febrilium spasticorum, qui universum æquabilem sanguinis cursum ac iter pervertunt, & fortio- rem impulsu sanguinis conciliant, origo prima ducenda sit. Certissima enim febris imminens, vel etiam eius recidivæ, indicia sunt: lassitudo & gravativum quasi totius corporis pondus, dolor capitis & circa primam lumborum vertebram fixus, cum languore omnium actionum animalium, levis frigoris per spinam dorsi decurrentis sensus, cum horripilatione & refrigeratione extremarum partium, quam postea oscitatio, pandiculatio, præcordiorum anxietas & abdominis tensio comitantur. Præterea in quartana, nonnunquam etiam in tertiana, subinde tanti tremores & concussiones corporis cum frigoris & horroris sensu, ac quasi contusivo pedum & pressorio capitis dolore, fiunt, ut convulsivas artuum agitationes adesse facile quispiam crediderit. Vidit etiam sæpius Ill. Dn. PRÆSES in senibus subtili accessione phantasiæ alienationem iunctam cum mentis aberratione. Ad graves has & infestas commotiones componendas, non præsentius antispasmodicis datur auxilium, teste Ill. Dn. PRÆSIDE, qui eiusmodi in casibus præter liquorem anodynum mineralem cum essentia castorei mixtum, pulveres nitrosos cinnabarinos, cum castoreo & croco nuptos, tempestive datos, nec non clysteres oleosos demulcentes, balnea ex aqua dulci & linimentum nervinum spinali medullæ calide applicatum, die præsertim intercalari, optimo cum successu adhibuit.

§. XII.

Ad hanc de genesi febrium doctrinam eo clarius exponendam & explanatius percipiendam, eximium sane mo-
men-

mentum mihi conferre videtur artificialis februm productio, cuius rei luculentissima quotidie in Carolinis thermis videre licet exempla, quod nimirum harum salubrium aquarum minus tempestivo & prudenti usu brevi tempore & pro lubitu febres excitari queant. Nam si quis sanguine vel impuris humoribus repletum corpus, intermissa conveniente evacuatione, vel thermarum potu, nimis cito & statim sub primo adventu in balneum paulo calidius dimittit, & aliquanto diutius ibi moratur, mox febriles prodromi, ut lassitudo, anxietas, inquietudo, vigiliæ, dolor dorsi & capitis, horripilatio, pulsuumque mutatio insultum minantur, & nisi cito convenientia præsidia opponantur, pro dispositione corporis, vel continua, vel intermittens, aut ex iis composita, hemitritæus aut erratica, periculi non expers, exoritur. Rationem huius peculiaris effectus, qui non tam facile ab immoderato etiam aliorum fontium mineralium abusu & calido etiam balneo expectandus est, in virtutem Carolinarum constrictoriam reiicimus, quæ tanta est, ut recentem vel etiam inveteratum pedum tumorem brevi tempore per balneum abigat, & exulceratas ac scabie infectas partes consolidet. Quando itaque sanguine & impuritibus refertum corpus in balneum dimittitur, subcutaneis vasis & fibris constrictis, non modo transpiratio impeditur, sed & humorum impetus ad interiora augetur & retrovertitur; hinc vasa minora membranarum cerebri & spinalis medullæ sanguine infarcta, accedente præsertim a calore externo nimia sanguinis expansione, oscillatorios & tremulos solidorum motus præter naturam adaugent, & febriles eiusmodi commotiones gignunt.

XIII.

Meminit quoque *Celsus Lib. VI. cap. 9.* febris per artificium provocata, & de curatione lentarum febrium agens, iubet: ut ad lentam, quæ est sine intermissione, febrem curandam, corpus ex aqua frigida tractetur; quoniam interdum sic eveniat, ut horror oriatur & fiat initium quoddam novi motus, ex quo, cum magis corpus incaluerit, sequatur etiam remissio quædam. Quamvis enim non perpetuo ex refrigeratione partium externarum a balneo aquæ frigidæ, motus febrilis gignatur; certissimum tamen est, id in dispositis corporibus, quibus iam mitiores motiones febriles insident, uti videmus in lentis, posse contingere.

§. XIV.

Hæc artificialis febrium productio multum sane facit ad genesin febrium eo facilius explicandam atque dilucidandam. Ex ea enim patefcit, quare sub veris & autumnii tempore, in locis maxime humidioribus & paludosis, subiecta quædam, præsertim iuvenilia, sensibilibioris naturæ, corpore impuris humoribus turgido, vestibisque non satis bene munito, tam facile incidant in febres, præsertim si post potum spirituosum, aut nimiam corporis incalescientiam sese vespertino aëri paulo diutius obiciant.

§. XV.

Contemplationi febrium per artificium productarum addendum denique est *Baglivi* memorabile experimentum, quod in *Praxi medica* p. 53. his verbis proponit: *ut cognitio veræ causæ febrium magis illustretur certiorque reddatur, cœpi duobus abhinc annis nova nostra methodo febres in canibus aliisque animantibus excitare, infundendo in venas varii generis liquores, spirituosos, aromaticos, acres, acidos*

Et similes ; eosdemque etiam cum cibo Et potu miscendo, donec febris excitata sit : qua excitata observo diligenter vehementiam eiusdem, inappetentiam, languorem, alvi siccitatem, tremores, periodos, aliaque id genus accidentia. Quo tentamine, utut in animantibus brutis instituto, edocemur: sanguinem impuris falsis, acribus & stimulantibus particulis nimis onustum, in nervosis partibus, quæ temperata maxime & blanda humiditate gaudent, irregulares & anomas passiones, quæ tandem in febriles desinunt, suscitare posse, idque maxime omnium, si externo frigore corripiantur, accidere. Hoc enim in febrium primordia studiosius inquirentes sæpissime fieri deprehendimus, quando corpora impura vel cruditatibus primarum viarum ex nimia venæsectione, diuturno præcedente morbo, animi affectibus, vel cibis incongruis & malæ digestionis ibidem coacervatis, obseffa sunt, & frigidiori nocturnæ auræ exponuntur ; quoniam hac ratione non facile dissolvendus humorum acrium ad membranas spinalis medullæ & cerebri sit decubitus.

§. XVI.

Quàmvis autem uberius hætenus demonstraverimus, in omni febre spinalem medullam cum membranis & nervis suis præternaturaliter esse affectam ; neutiquam tamen existimamus, semper primario & proxime in hisce febrium causam hæcere, sed potius asseveramus, eandem in aliis locis nervosis nonnunquam latitare & per consensum spinalem medullam afficiendo febribus sic dictis symptomaticis originem præbere. Notissimum enim iis, qui artis exercitio vacant, est, nervosarum & tendinosarum partium læsionibus, sive a punctura, sive a contusione vel vulneratione fiant, febrem associari ; quin immo

atro-

atrociores, quæ partes nerveas infestant, dolores, spasms febrilibus perpetuo fere stipari, eamque ob causam gravio-rem intestini ilei aut coli dolorem, & qui a calculo ure-teribus vel ductibus biliariis impacto nascitur, aut qui articularum nerveo-tendinosi ligamenti infidet, nunquam nisi febre & spasmo comitatum infestare. Porro ob nimis laceffitam a prorumpente dente gingivam in infantibus gravissima symptomata, febrem, convulsionem & epilepsiam exoriri, in vulgus notum est. Simili præterea modo a sola tunicarum intestinalium per vermes arrosione totum nervosarum partium systema in consensum rapi, & febres & motus convulsivi, epileptici supervenientes planum faciunt atque testatum. Denique in abscessu si incipit puris generatio, ingens & dolorifica reddita fibrarum tensio fe- bri ingeneranda lola sufficit; uti id clarissime apparet in variolarum morbo, eo in primis tempore, quo efflorescen- tiæ in suppurationem abire incipiunt.

§. XVII.

Quum vero nulla in universo corpore pars præter ventriculum & intestinorum canalem, propter membrana- ceam fibroso-nerveam structuram, & insignia illa nervo- rum paria, a quibus ramificationes accipit, octavum nem- pe & intercostale, tanta gaudeat sympathia & consensione cum cerebro, spinali medulla eorumque membranis, im- mo cum toto nervosarum partium genere; non sane mi- randum est, a graviter læsa & afflicta ventriculi & intestino- rum substantia totam œconomiam motuum & functio- num naturalium subverti: neque tantum nerveas & mu- sculosas partes sævas spasticas contractiones pati, sed & fe- briles motus in toto vasorum genere, si ad illud spasmodorum vehementia pertingit, excitari. Clarissimum huius rei ex-

emplum exhibet venenum causticum, quod sumtum, sola arrofione nervearum ventriculi & intestinorum tunicarum, brevi tempore vim suam motuumque violentiam in universum fibrarum & vasorum systema spargens, ordinem & œconomiam motuum, qui fiunt secundum naturam, pervertendo, vitam, nisi cito succurramus emollientibus & relaxantibus, adimit. Neque prorsus dissimilia symptomata a bile caustica, in ventriculi & duodeni cavitate stagnante, hypochondriaca vel cholERICA passione laborantes gravissime infestant. Ex quibus dictis iam liquido apparere arbitror, febrilium & spasticorum motuum proximam & materialem causam in remotis a cerebro & spinali etiam medulla partibus sedem suam collocare posse; quamvis postea eius potentia & vis ob communionem & consensionem partium demum ad motuum tonicorum & nervorum ac membranarum nervearum fontem, intelligo medullam spinalem & cerebrum, transcendat.

§. XIX.

Quapropter in hac febrium doctrina merito distinguendum esse censemus, inter subiectum morbi sive motuum febrilium spasticorum, quod in nervorum & membranarum est principio, & inter subiectum causæ morbi-ficæ, sive febrilis, quod non semper ibi est, sed in dissitis etiam partibus nonnunquam delitescit. Sæpissime enim, ut nostra quidem fert sententia, febrium, tam intermittentium, quam continuarum, præsertim quæ contagio serpunt, causa, focus ac fomes prima in regione collocari debet: maxime quando consideramus, nullam corporis partem morborum causis ingenerandis & fovendis tam aptam esse atq; idoneam, quam hunc alimentorum & excrementorum ner-

veo-membranaceum canalem. Hic enim non solum diversæ indolis ingesta recipit, sed etiam communis quasi sentina est, in quam ex universo corpore valde activæ & fermentescibilis, ex parte etiam peregrinæ & excrementitiæ indolis humores, confluunt : neque dubium est, quin materia excrementitia, a suppressa potissimum perspiratione retenta, lymphaticis & biliosis humoribus intermixta, tandem ad hunc canalem transfundatur. Accedit quod morborum semina, miasinata, immo virulentæ & peregrinæ indolis, quæ aëre vehuntur particulæ, cum saliva, cibo & potu intus haustæ, feralem suam vim ibi primum exercent. Tandem nec illud prætermittendum est, quod nullum viscus, vel corporis pars sit, in qua humores tam facile stagnare, diutius hære & mora corrumpi possint, quam in canali illo, qui tot flexuris, plicis, valvulis ac cel-
lulis instructus est.

§. XIX.

Nemo itaque non facillime perspiciet : ad fabricandas causas morbificas & præbendam iisdem sedem non esse aptiorem primis viis locum. Qua re inducti non dubitamus asserere : intermittentium pariter ac epidemiarum & contagiosarum febrium causam in prima regione ponendam & ex ea primam motuum febrilium & spasmodorum originem petendam esse ; quod argumentum & copiose & accurate in Dn. PRAESIDIS Dissertationibus *de duodeno multorum morborum sede & de consensu partium* pertractatum est. Habemus etiam hac in re clarissimorum Medicorum consentientem auctoritatem & maxime *Helmontii, Ettmülleri, Sylvii, Baglivi, Diemerbroeckii* & ex antiquioribus *Fernelii*, qui libro de febribus cap. 10. hunc in

modum verba facit: *omnium februm propria sedes & origo in prima est corporis regione, circum præcordia, ex ista sede februm horrores rigoresque suscitantur. Omnium eadem similisque causa, caloris nempe frigoris, rei purgentis aut quovis modo molestæ vehemens incurio in corporis sentientes partes confertim facta.* Solenne enim est a contagio hausto exortas febres cum nausea, anxietate, corporis iactatione, inappetentia, horripilatione, capitis & dorsi dolore, interdum etiam cum singultu, syncope & vertigine inchoare, mox cutem inhorescere & pulsum mutari: ubi profecto Medicus prudens, in principio accitus, medicamentum emeticum cum temperante mixtum propinando, vel etiam pro ratione circumstantiarum repetendo, & demum subiungendo sudoriferum, funestam sæpius febrem ex toto avertere, vel saltem eius vehementiam mirifice mitigare valet. Quod consilium, maxime in febribus castrensis, morbo sic dicto Hungarico, petechiis quoque variolis & morbillis si tempestive & prudenter sequamur ad eas abigendas & sanitatem redintegrandam omne fert punctum. Februm vero, quæ intermittunt, itidem in prima regione focum atque originem quærendam esse, clarissime comprobatur expertissima eas sanandi methodus, quæ in eo potissimum versatur: ut primæ viæ, quam primum fieri potest, per potum emetico-laxantem v. g. mannatum, cum sale abstersivo & tartaro emetico mixtum, ab excrementitiis sordibus probe repurgentur, interpositis pulveribus absorbentibus & salino-deterfivis, idque aliquoties repetatur; dein finita accessione & vacuis diebus per diaphoretica perspiratio promoveatur, & denique motus febriles, causa morbosa prius sublata, sistantur, adhibitis hunc in finem antispasmodicis & roborantibus, quo

quo illis spasmi compescantur, hæc vero universum nervosarum partium genus roborando, æquabiliorem fluidorum circuitum cum excretionibus & secretionibus convenientibus restituant, neque minus stagnationem & decubitum humorum in partibus debilioribus præpediant, ne nova materia febrilis generetur. Lentarum febrium, causam & fomitem plerumque etiam prima in regione delitescere exinde dilucide patescit, quod eadem maxime aliis morbis superveniant & demum ex iis prodeant, si, quando corpus adhuc viribus exhaustum & ventriculus imbecillis est, ingens ciborum copia, neglecta simul perspiratione, ingeritur, ut postea cruditas semper ex cruditate gignatur & colluvies acido - viscidorum biliosorum colligatur.

§. XX.

Præter has recensitas febrium species, quæ in prima regione gignuntur, dantur adhuc aliæ, quæ causam materialem itidem non in cerebro & spinali medulla collocatam habent. Accensemur hisce ex continuis febres sic dictas inflammatorias, quæ primam & fixam sedem in partibus inflammatione affectis habent, & exinde in membranarum systema vim suam dispergunt; ut postea febriles spastici motus totum corpus occupent. Quemadmodum vero omnes internæ inflammationes febribus stipari solent; ita hoc maxime in iis evenit, quæ in nervosis partibus consistunt, & propterea maius periculum alunt: sicuti videmus in inflammatione ventriculi, intestinorum, phrenitide, quibus acutiores & periculosiores complicantur febres, quam pleuritidi, peripnevmonia, hepatitidi, vel mesenterii aut uteri inflammationi.

§. XXI.

§. XXI.

Porro commemorandæ sunt aliæ adhuc febres, quæ ex intermittente & continua compositæ & a Græcis variis insignitæ sunt nominibus, inter quas notissima est hemitritæus. Duplex enim harum febrium sedes ac causa est: una in primis viis existens, typum intermittentis febris molitur, altera in visceribus & partibus internis præternaturaliter affectis & inflammatis delitescit, & febrem facit continuam; quare hæ febres in se quidem sunt continuæ, sed a causa intermittantium ingentes exacerbationes accipiunt.

§. XXII.

Dantur etiam febres, quæ cum ingenti horrore & frigore invadunt & intermittentes mentiuntur, nonnunquam etiam periodos certosque typos exhibent, quarum tamen nonnullæ vel statim in principio, vel exactis aliquot paroxysmis, in continuas non sine periculo trans-eunt; id quod maxime in plethoricis & impuris corporibus post refrigerationem, graves animi affectus, vel medicamenta irritantia & calidiora adhibita, contingit. Nec ratio generandi in obscuro nobis posita videtur: etenim quando corporis vasculosa superficies externa nimis a spasmo constringitur, reprimatur sanguis ad partes interiores, qui si copiosus, spissus & crassus est, perquam facile in debiliores partes cum impetu intrudi potest, ut ibi non tantum stagnationem, sed etiam stasim, quæ inflammationum mater est, concipiat; eodem modo certissimum erysipellacæ inflammationis futuræ indicium est, si hominem sanum ex improvviso simul & semel ingens frigus cum terrore & horrore corripit.

§. XXIII.

§. XXIII.

Haëtenus de motuum febrilium indole ac sede fusius atque curatius, quantum quidem instituti tulit ratio, differuimus; iam nihil superest, quam ut ex universa illa consideratione hæc adhuc in felicioris Praxeos usum & fructum delibemus.

I. Radicati quidem sunt febriles motus maxime in vehementi nervosarum partium spastica constrictione; atamen non ex omni particulari spasmo, vel dolore, aut convulsione fit febris, sed hæc tum demum exoritur, quando universum genus nervosum, membranæ cerebri & omnes vasorum tunicae, quæ systaltica & contractili vi instructæ sunt, in consensum pertrahuntur.

II. Notabilis in continuis maximæ symptomatum fit remissio sub spastica contractilitate mitiori reddita; plenaria vero intermissio contingit, quando ad tempus hæc spasmorum tragœdia cessat: nec febris ex toto tollitur, nisi spasticorum motuum vehementia penitus fuerit sublata.

III. Crescente spasmorum vehementia, increscit quoque in febre periculum; immo ipsa mors sub spasmis, & per spasmos vehementiores accedit.

IV. Aucta cordis & arteriarum systoles, & sanguinis ad partes extremas impulsus validior factus, vehementiæ spasmorum mirum in modum resistit: unde sub pulsu vegetiori, intensiori æstu & aucta siti, maior spes felicitis febrilium eventus superest, quam sub languido, parvo & intermittente pulsu, extremorum frigore humidique appetentia extincta. Hic enim sanguinis circulus est illa Hippocratis natura, morborum & potissimum febrium optima medicatrix, quæ ut febrilem materiam eliminet & spasmos ab ea prodeuntes tollat, mora eget, quo illud certis

temporibus, quæ critica vocantur, efficacissime & cum euphoria perficere queat.

V. Omnis medentis intentio in persanandis febribus eo dirigenda est, ut omnia ea, quæ liberum sanguinis cursum impediunt, removeantur, nihil, quod vehementiam spasmodorum augere possit, admittatur, æstus intensior, qui succos vitales ipsasque vires destruit, attemperetur, sanguis fluidus & in proportionata quantitate, ne copia vel defectu peccet, fervetur, & denique ne quidquam vel vi vel præcipitantia sub toto morbi decursu agatur, sed omnia circumspecte & moderate sub beneficio & expectatione opportuni temporis administrentur. Hæc potiora sunt in curatione febrium momenta & præcipuæ iisdem medendi indicationes, quas qui curatius expendet & ex earum præscripto cuncta perficiet, illius & consiliis & auxiliis exoptatissimus nunquam non respondebit

F I N I S.



